



**Giusep Berther-Valier,  
1913-1999**

Ella Tuatschina dils 23 d'october 1998 hai jeu secret ina gratulaziun per igl 85avel anniversari da Giusep Berther. Cura ch'jeu sun staus tier el per quei intent era el aunc bein en gamba. Denter auter manegia el denton denter rir e da detschiert ch'ei seigi gleiti da prender dimora sut s. Vigeli. Presentimenti? La primavera vegn el malsauns ed el po buca resister pli a quella attacca.

Giusep Berther ei naschius ils 27 d'october 1913 sco emprem fegl da Vigeli e Mariuschla Berther-Schmid da Gonda. Suenter las scolas empren el da tagliacrappa, in mistregn pauc usitau da lezzas uras en Tujetsch. Suenter in temps practica lavura el sur sesez en siu mistregn e fa dasperas aunc pegas da scalegl. Entuorn 1945 daventa el cau dalla fabrica da scalegl a Sedrun che sto deplorablamein serrar sias portas gia suenter paucs onns. Silsuenter lavura il Giusep tier differentas firmas, specialmein tier il Murer ed il davos tier l'Ovra electrica da Tujetsch.

1947 marida el la Ludivina Valier da Camischolas ed in onn suenter cumpleteescha la feglia Marta la ventira matrimoniala.

Sper la lavur da mintgadi s'engascha il Giusep era en differents uffecis, sco per exempli sco president dalla Corporaziun digl aquaduct s. Gions e sco ugau da differentas personas. Era per la cultura ha el prestau bia, eis el gie staus 44 onns commember dalla Societad da musica. Igl ei perquei stau ina biala gesta che l'uniun numnada ha priu comiau musicalmein da siu commember d'honur a caschun da sia sepultura.

El temps liber deva il Giusep bugen troccas ed el saveva magari schon sescaldar. El fageva era bugen viadis ensemen cun sia dunna e sias soras. Cheu fageva el adina il guid e quei cun distincziun.

Suenter ina veta da lavur e da quitaus, denton era da satisfacziun e plaschers ha il Giusep priu comiau da nus ils 17 da matg 1999. El ruaussi en pasch!